

# Empangan Timah Tasoh kini di paras bahaya

**KANGAR** - Paras air di Empangan Timah Tasoh di sini mencatat bacaan paling rendah iaitu 26.78 meter, menurun dua milimeter berbanding 26.8 meter semalam.


Pengarah Jabatan Pengairan dan Saliran (JPS) Perlis, Ir. Abdul Najib Abdullah berkata, paras itu adalah yang terendah pernah dicatat sejak empangan itu beroperasi pada 1992.

Paras kritikal adalah 25.0 meter.

"Paras air dicatat hari ini (semalam) lebih rendah daripada yang pernah berlaku pada 24 Julai 1998 setinggi 27.04 meter ketika fenomena El-Nino melanda negara," katanya kepada *Bernama* di sini semalam.

El-Nino adalah fenomena pemanasan suhu permukaan laut yang berlaku setiap tahun di timur Lautan Pasifik berhampiran luar pantai Peru.

Kejadian itu menyebabkan perubahan iklim di seluruh dunia yang membawa hujan lebat di sesetengah ka-



**SEBUAH** sampan milik nelayan tersadai di tebing empangan Timah Tasoh yang surut akibat cuaca panas terik semalam.

wasan dan kemarau panjang di kawasan lain.

Abdul Najib berkata, cuaca panas dan kering berpanjangan di Perlis sejak Disember tahun lepas menyebabkan paras air di empangan itu menurun ke paras terendah.

"Situasi ini menyebabkan JPS terpaksa menanggungkan bekalan air untuk pengairan sawah padi seluas lebih 3,000

hektar membabitkan lebih 6,000 petani yang menanam padi di luar musim sehingga Jun ini.

"Bekalan air untuk keperluan domestik bagaimanapun tidak terjejas sekurangnya untuk tempoh dua bulan lagi walaupun kemarau berterusan," kata Abdul Najib.

Selain Empangan Timah Tasoh, beliau berkata, 50 pe-

ratus sumber air Perlis adalah dari Sungai Arau yang menerima air dari Lembaga Kemaajuan Pertanian Muda (Mada) Kedah.

Empangan Timah Tasoh menyalurkan sebanyak 58,000 meter padu air sehari untuk kegunaan domestik dan kira-kira 532,000 meter padu lagi untuk tanaman padi di seluruh negeri, katanya.

Empangan Timah Tasoh seluas 13.3 kilometer persegi membekalkan hampir 50 peratus keperluan air negeri ini, meliputi kawasan utara Perlis termasuk Padang Besar dan Kangar dengan penduduk berjumlah lebih 100,000 orang.

Abdul Najib menasihatkan orang ramai supaya berjimat menggunakan air serta tidak mencemarkan punca air sama ada sungai atau kolam.

Katanya, JPS sentiasa memantau keadaan bagi memastikan pengurusan bekalan air dilakukan secara sistematik. - *Bernama*